



## KEMENTERIAN WILAYAH PERSEKUTUAN

Blok 2, Menara Seri Wilayah, Presint 2, 62100 Putrajaya

Tel: 03-8889 7888 Faks: 03-8889 7957

Laman web: [www.kwp.gov.my](http://www.kwp.gov.my)

# SIARAN MEDIA

## UNTUK LIPUTAN MEDIA MASSA

### **10 KOMUNITI INDIA TERIMA SUMBANGAN CSR MELALUI PROGRAM BAITI JANNATI @ WILAYAH PERSEKUTUAN**

**KUALA LUMPUR, 15 Oktober** – Perayaan Deepavali pada tahun ini pasti menjadi ingatan abadi buat 10 komuniti India yang selama ini menduduki PPR dan PA DBKL di Wilayah Persekutuan Kuala Lumpur. YB Datuk Seri Utama Tengku Adnan bin Tengku Mansor, Menteri Wilayah Persekutuan dan isteri, YBhg. Datin Seri Utama Anggraini Sentiayaki merangkap Pengurus Persatuan Badan Amal Kasih Ibu Wilayah Persekutuan serta YB Dato' Dr. Loga Bala Mohan, Timbalan Menteri Wilayah Persekutuan turut sama menyerahkan surat pemilikan unit kediaman tersebut.

Para penerima yang merupakan golongan miskin bandar dipilih dari kalangan mereka yang mempunyai anak orang kurang upaya (OKU), berpenyakit kronik, suami atau isteri yang sudah meninggal dunia, tanggungan anak yang ramai, tempoh penyewaan di rumah PPR dan PA DBKL yang melebihi 5 tahun, pernah memberi sumbangan kepada negara dan mempunyai anak-anak yang cemerlang di dalam pelajaran. Latar belakang tersebut merupakan antara kriteria utama pemilihan calon program Baiti Jannati @ Wilayah Persekutuan ini.

Menurut YB Menteri Wilayah Persekutuan, menerusi program ini, sumbangan yang diterima akan dimanfaatkan untuk menyelesaikan pinjaman perumahan atau sewa rumah yang tertunggak. Selain itu, sumbangan ini juga akan digunakan untuk membaiki dan melengkapkan peralatan asas rumah mereka yang serba kekurangan seperti perabot dan lain-lain. Unit kediaman ini seterusnya dipindahmilikan kepada Ketua Penyewa yang sedia ada.

Program Baiti Jannati @ Wilayah Persekutuan merupakan inisiatif tanggungjawab sosial (CSR) Kementerian Wilayah Persekutuan (KWP), Dewan Bandaraya Kuala Lumpur (DBKL), Yayasan Wilayah Persekutuan (YWP), Badan Amal Kasih Ibu Wilayah Persekutuan dan Mah Sing Group Berhad.

Sebelum ini program Baiti Jannati @ Wilayah Persekutuan telah dilaksanakan pada Jun 2017 yang melibatkan 26 orang asnaf beragama Islam yang disumbangkan oleh Celcom, YWP, Badan Amal Kasih Ibu Wilayah Persekutuan dan Yayasan Al-Mansoriah. Manakala 10 penerima Baiti Jannati @ Wilayah Persekutuan (komuniti India) pada hari ini adalah hasil sumbangan CSR dari Mah Sing Group Berhad.

Pengarah Urusan Kumpulan Mah Sing, Tan Sri Dato' Sri Leong Hoy Kum berkata bahawa mereka turut menumpang gembira untuk keluarga yang menerima kunci rumah baru. Mereka akan berusaha sebaik mungkin untuk menyumbang dan mengambil pendekatan proaktif untuk menyokong kerajaan dan badan kebajikan seperti Badan Amal Kasih Ibu Wilayah Persekutuan dalam usaha membasmi kemiskinan.

"Sebagai pemaju perumahan, Mah Sing berhasrat untuk membina pembangunan terancang dengan rumah berkualiti tinggi yang berharga kurang dari RM500,000. Daripada 34 projek kami di sekitar Lembah Klang, sembilan daripadanya adalah projek di bandaraya Kuala Lumpur. Selaras dengan tagline Mah Sing, *Reinvent Space, Enhance Life* ia mencerminkan kesungguhan kami untuk memupuk nilai-nilai murni dan kemanusiaan menerusi Mah Sing Foundation. Selain daripada membina rumah untuk rakyat, kami akan melakukan yang terbaik untuk menyumbang kepada golongan yang kurang bernasib baik. Kami berbesar hati dapat bekerjasama dalam menjayakan program Baiti Jannati @ Wilayah Persekutuan," tambah beliau lagi.

Pelaksanaan program Baiti Jannati @ Wilayah Persekutuan ini tidak lain adalah bertujuan membantu golongan miskin tegar dan miskin bandar di Wilayah Persekutuan dalam memiliki rumah sendiri yang selama ini disewa di kawasan PPR dan PA DBKL.

Inisiatif mensejahterakan rakyat ini juga bertujuan memantapkan nilai-nilai murni serta mencerminkan keprihatinan organisasi KWP dan agensi dalam membantu golongan yang memerlukan di Wilayah Persekutuan. Melalui program Baiti Jannati @ Wilayah Persekutuan ini, pihak kerajaan sentiasa berusaha untuk memastikan setiap programnya memberi manfaat kepada kumpulan sasar.

**Disediakan oleh**  
**Bahagian Komunikasi Korporat**  
**Kementerian Wilayah Persekutuan**  
**15 Oktober 2017**